



REPUBLIKA E SHQIPËRISË
KUVENDI
KOMISIONI PËR POLITIKËN E JASHTME

Dokument Parlamentar

Tiranë, më 17.12.2018

RAPORT

PËR
PROJEKTLIGJIN

**“PËR RATIFIKIMIN E MARRËVESHJES PËR BASHKËPUNIMIN,
NDËRMJET REPUBLIKËS SË SHQIPËRISË DHE EUROJUST-IT”**

Komisioni për Politikën e Jashtme, në cilësinë e Komisionit për dhënie mendimi, në mbledhjen e datës 17.12.2018, mori në shqyrtim projektligjin *“Për ratifikimin e marrëveshjes për bashkëpunimin, ndërmjet Republikës së Shqipërisë dhe EUROJUST-it”*.

Në mbledhjen e Komisionit për të prezantuar projektligjin dhe për të dhënë shpjegime për pyetjet e anëtarëve të Komisionit ishin të pranishëm përfaqësues nga Ministria e Drejtësisë.

I. BAZA KUSHTETUESE E PROJEKTLIGJIT

Projektligji i paraqitur për shqyrtim është propozuar nga Këshilli i Ministrave, sipas përcaktimeve të neneve 78, 83 pika 1 të Kushtetutës së Republikës së Shqipërisë dhe shoqërohet me relacionin përkatës sipas nenit 68 të Rregullores së Kuvendit.

Ratifikimi i kësaj marrëveshje bazohet në Kushtetutën e Republikës së Shqipërisë, Kreu II “Marrëveshjet Ndërkombëtare”, neni 121 i saj.

II. QËLLIMI DHE PËRMBAJTJA E PROJEKTLIGJIT

Qëllimi i projektligjit është ratifikimi i marrëveshjes së bashkëpunimit ndërmjet Republikës së Shqipërisë dhe EUROJUST-it, marrëveshje e cila synon të forcojë bashkëpunimin gjyqësor dhe të kontribuojë në realizimin e pesë prioritetëve të vendosura nga Komisioni Evropian ndaj Republikës së Shqipërisë, veçanërisht në kuadër të prioritetit të katërt “Lufta kundër krimit të organizuar”.

Ky bashkëpunim gjyqësor është i rëndësishëm për ndërtimin e besimit të ndërsjelltë ndërmjet autoriteteve gjyqësore të shteteve anëtare dhe për promovimin e një kulture të mirëfilltë gjyqësore dhe ligjore evropiane.

Objektivat kryesorë të këtij projektligji janë:

- Fuqizimi i bashkëpunimit në luftën kundër krimeve të rënda, veçanërisht krimit të organizuar dhe terrorizmit;
- Bashkërendimi dhe financimi i veprimeve hetimore të përbashkëta, njëkohësisht me financim të BE-së, nëpërmjet skuadrave hetimore të përbashkëta;
- Garantimi i një niveli mbrojtjeje për të dhënat personale të ofruara nga pala tjetër, në respektim të Konventës së Këshillit të Evropës, të 28 janarit 1981, “Për mbrojtjen e individëve në lidhje me përpunimin automatik të të dhënave personale”, dhe të parimeve të përcaktuara në vendimin e Eurojust-it.

Realizimi i këtyre objektivave do të intensifikojë progresin e bërë në luftën kundër krimit të organizuar, trafikimit dhe terrorizmit dhe do të përmirësojë masat e marra nga ana e shtetit shqiptar, në kuadër të përmirësimit të klimës në drejtësi.

Kjo marrëveshje vjen pas miratimit në parim me Vendimin nr.290, datë 21.5.2018, të Këshillit të Ministrave.

Nënshkrimi i kësaj marrëveshjeje kërkon përmbushjen e kushteve dhe të standardeve të përcaktuara në lidhje me përpunimin dhe mbrojtjen e të dhënave personale, në përputhje me Konventën e Këshillit të Evropës nr.108, të 28 janarit 1981, “Për mbrojtjen e individëve në lidhje me përpunimin automatik të të dhënave personale”, si dhe protokollin shtesë të saj.

Më 11.5.2017 janë zhvilluar në Hagë, në ambientet e Eurojust-it, bisedimet ndërmjet delegacionit të Eurojust-it dhe atij të Republikës së Shqipërisë, për arritjen e një drafti të pranueshëm nga palët, sipas modelit të marrëveshjes së propozuar nga Eurojust, duke bërë, sipas rastit, edhe ndryshimet e nevojshme për të pasqyruar kërkesat e legjislacionit në fuqi në Republikën e Shqipërisë. Gjatë negociimit, palët pjesëmarrëse kanë shprehur dakordësinë e tyre për të gjitha nenet e marrëveshjes së bashkëpunimit dhe takimi është përmbyllur me nënshkrimin e marrëveshjes së negociuar nga krerët e të dyja delegacioneve, e cila pritet të ratifikohet nga Kuvendi i Republikës së Shqipërisë.

Marrëveshja është hartuar nga Eurojust-i dhe është përkthyer e certifikuar nga Ministria e Drejtësisë.

Për zbatimin e saj do të jetë përgjegjëse Prokuroria e Përgjithshme.

Për të lehtësuar bashkëpunimin e parashikuar në këtë marrëveshje dhe në mbështetje me dispozitat e nenit 27 (3) të vendimit për Eurojust-in, shteti palë i kësaj marrëveshjeje cakton një prokuror si pikë kontakti. Prokurori ndërlidhës i nënshtrohet ligjit shqiptar, në lidhje me statusin e tij, mandatin, kompetencat dhe kohëzgjatjen e komandimit.

Marrëveshja me Eurojust-in mundëson financimin e veprimeve hetimore të përbashkëta në disa shtete njëkohësisht me financim të BE-së, nëpërmjet strukturave hetimore të përbashkëta.

Nëse nga ekzekutimi i kësaj marrëveshjeje lindin shpenzime të një natyre të jashtëzakonshme, palët mund të konsultohen me synim përcaktimin e mënyrës në të cilën duhet të trajtohen, si dhe këto shpenzime do të përballohen brenda tavaneve të miratuara për institucionet që janë palë e kësaj marrëveshjeje.

III. PËRFUNDIME

Në përfundim të shqyrtimit të këtij projektligji, Komisioni pasi vlerësoi se:

Në aspektin ligjor, projektligji i propozuar është në përputhje me Kushtetutën dhe legjislacionin në fuqi;

Në aspektin procedural, projektligji është paraqitur në përputhje me Rregulloren e Kuvendit,

dhe pasi e shqyrtoi projektligjin në parim, nen për nen dhe në tërësi, e miratoi atë me votat e të gjithë anëtarëve të pranishëm dhe u shpreh dakord për kalimin për votim në seancë plenare.

KRYETARE

MIMI KODHELË